

ԱՂՕԹՔ՝ ՔԵՍԱՊԻ ԽԱՂԱՂՈՒԹԵԱՆ ՀԱՄԱՐ

Սուրիացի ազնիւ արաբ ժողովուրդն ու սուրիահպատակ այլ ազգի պատկանող հաւաքականութիւններ, երկրին այսօրուան քաղաքական պայմաններուն բերումով, դէմ յանդիման կը գտնուին անհանգիստ ու անկայուն շրջապատի մը մէջ, զոր կը խանգարէ մարդ արարածին առօրեայ կեանքն ու հանգստութիւնը: Սակայն հայ ժողովուրդին անսասան հաւատքն ու սէրը առ Աստուած, յոյս կը ներշնչեն հաւատացեալ ժողովուրդին տարբեր խաւերու զաւակներուն սրտերուն եւ հոգիներուն մէջ բոլոր ժամանակներու դժուարութիւններն ու մարտահրաւերները դիմագրաւելու քրիստոնէավայել ըմբռնումով:

Վերջին հարիւր տարիներու ընթացքին այս երրորդ անգամնէ, որ հայերը ստիպողաբար կը լքեն Քեսապ (1909, 1915, 2014)էւ երեքին պարագային ալ Թուրքիան նախայարձակ եղած է կամ նախայարձակներու կողմնակից:

Սուրիոյ քաղաքացիական պատերազմի անցնող երեք տարիներու ընթացքին, թէեւ Քեսապը ապրեցաւ տագնապալի ելեւէջները, սակայն մնաց ապահով շրջան բաղդատած Սուրիոյ այլ շրջաններու: Սակայն 21 Մարտ, 2014-ին, զարնան առաջին օրուան մէջ, Քեսապի զարունը վերածուեցաւ ձմրան, անոր համար որ հրէշային զինեալ խմբաւորումներ, Թրքական հովանիին ներքոյ, Քեսապի եւ սահմաններու շրջաններէն ներթափանցումներ կատարեցին, որուն իբրեւ արդիւնք Քեսապը պարպուեցաւ իր հարազատ բնակիչներէն:

Այս տխուր առթիւ, Հայ Աւետարանական Բեթէլ Եկեղեցիին մէջ, Կիրակի 30 Մարտ, 2014-ին, տեղի ունեցաւ հաւաքական յատուկ պաշտամունք, նուիրուած՝ Սուրիոյ ասպնջական եւ յատկապէս՝ Քեսապի խաղաղութեան համար: Պաշտամունքին ներկայ էին Պետական բարձրաստիճաններ, Վեր. Համայնքապետ Յարութիւն Սելիմեան, հոգեւոր հովիւներ, Տնօրէնութիւններ եւ ուսուցչակազմ՝ Հալէպի Հայ Աւետարանական Վարժարաններու եւ հոծ բազմութիւն: Եկեղեցին իր

ժողովուրդին հետ միաձուլուած Վեր. Համայնքապետին առաջնորդութեամբ աղօթք բարձրացուց առ Աստուած հայցելու Արարիչին գթութիւնն ու բարեխնամութիւնը:

Վեր. Համայնքապետը Սուրիոյ զօրակցութեան որպէս նշանաբան կանխատեսած էր Սուրիոյ դրօշի առկայութիւնը եկեղեցւոյ մէջ, որովհետեւ երկրի մը գոյատեւման գործօններէն մէկը, այդ երկրի դրօշին ծածանումն է:

Պաշտամունքի առաջնորդութիւնը կատարեց Պատ. Սիմոն Տէր Սահակեան, ներկաները հրաւիրելով փառաբանութեան երգեցողութեան եւ փոխադարձաբար կարդալով 4-րդ փոխասաց ընթերցուածը, ուր կը շեշտուի, թէ՛ Աստուած ամենակարող է եւ Անոր ծածկոցին տակ բնակողը Իր հովանաւորութեանը տակ պիտի հանգչի, ուստի ապաւինինք եւ յուսանք մեր Փրկիչ Աստուծոյն:

Պաշտամունքին՝ նուագածութեամբ իրենց մասնակցութիւն բերին Տիկ. Շողակաթ Սելիմեան (ղաշնամուր), Օր. Լիլա Սահակեան (Ջութակ), Օր. Լիզա Սահակեան (Ֆլութ) եւ Տիար Էտուար Թարգի (Կիթառ), որոնք երաժշտական բացառիկ կատարողութեամբ ներկաներուն շնորհեցին ազդեցիկ պահեր, հրաւիրելով զանոնք ըլլալու ազգային հաւատարիմ քաղաքացիներ: Որմէ ետք Տիկ. Բալիկ Գալեմբերեան Բօթօվա (Մեցցօ Սօփրանօ), հրամցուց ազգագրական երգեր, որոնք մեծապէս տպաւորեցին ներկաները:

Աստուծոյ խօսքին պատգամը փոխանցեց Վեր. Յարութիւն Սելիմեան: Ան անդրադարձաւ թէ՛ մինչ մեծ պահքի օրհնեալ եղանակին մէջ կը գտնուինք, ուր փորձութիւնն ու չարը շրջապատած են մեզ ամէնուրեք, մատնանշեց, թէ՛ ինչպէս Տէր Յիսուս իր մատնուած գիշերը աղօթեց իր անձին եւ իր աշակերտներուն համար, որպէսզի փորձութեան չմատնուին, նոյն նպատակով այսօր հաւաքուած ենք Աստուծոյ տան մէջ «ԲԵԹԷԼ», մեր սրտաբուխ աղօթքները բարձրացնելու առ Աստուած, մեր անձերուն եւ մեր շատ սիրելի ասպնջական Սուրիոյ, յատկապէս՝ Քեսապի համար, որ ենթարկուեցաւ հակայարձակումներու ընդդիմադիր խմբակներու կողմէ, Թուրքիոյ ներդրումով ու քաջալերանքով: Ան

ակնարկեց, թե՛ Տէր Յիսուս կ'աղօթէ, որ աշակերտները ըլլան մէկ միտք եւ մէկ խորհուրդ եւ Տէրը պահէ զիրենք չարէն ու փորձութենէն: (Յովհ. 17:11-12): Ան ընդգծեց, թե՛ Յիսուս՝ որ կը նշանակէ Փրկիչ, Փրկիչ մը որ աշխարհ պիտի գար փրկելու եւ պահելու իր աշակերտները, այսօր պիտի փրկէ նաեւ եկեղեցին եւ համայն Սուրիան չարէ: Ինչպէս Տէր Յիսուս կը յիշէ թե՛ աշակերտները Աստուծմէ տրուած են Իրեն, որպէսզի պահէ ու պահպանէ զանոնք, ուստի, գիտակցելու ենք, թե՛ նոյնպէս Սուրիական հայրենիքը նման է Յիսուսի աշակերտներուն: Անոնք վստահուած են Աստուծոյ հոգածութեան ներքոյ, որովհետեւ անոնք Աստուծոյ մշակութիւնն են եւ կը պատկանին ստեղծագործ Աստուծոյ: Վերապատուելին իր խօսքի աւարտին ներկաներուն ուշադրութիւնը հրաւիրեց, թե՛ Յիսուս իր աշակերտներուն փրկութիւնը կը տեսնէր միութեան մէջ, նոյնպէս այսօր Սուրիական հայրենիքի փրկութիւնը իր միութեան մէջ կը կայանայ, իբրեւ քրիստոնէաներ եւ իսլամներ՝ Աստուծոյ հաւատացող մէկ ազգ: Վերապատուելին եզրակացուց ըսելով՝ «Եթէ կայ ու գոյութիւն ունի փրկութիւն եւ յաղթութիւն Սուրիական Հայրենիքի համար, այս յաղթութիւնը կ'իրականանայ եւ կ'իրագործուի իր միութեամբ ու ընկերային եւ կրօնական բովանդակութեամբ: Միութիւնը՝ շուրջիններուն կարիքները ապահովելու եւ ամբողջացնելու մէջ չէ, այլ ըլլալ մէկ եւ կարեկցող դժուարին պայմաններուն մէջ: Մեծ պահքի շրջանին մէջ իւրաքանչիւրս կանչուած ենք ծոմապահութեամբ մեր ձայները բարձրացնելու Աստուծոյ, խնդրելով Աստուծոյ առաջնորդութիւնն ու ներկայութիւնը մեր կեանքերուն համար»: Վերապատուելին խնդրեց Աստուծոյ օրհնութիւնը Սուրիական ասպնջական հայրենիքին համար:

Պաշտամունքի ընթացքին տեղի ունեցան սրտաբուխ աղօթներ եւ վկայութիւններ նահատակուող անհատներու ընտանիքներու կողմէ:

Պաշտամունքի աւարտին Պասս կուսակցութեան ընդհանուր քարտուղար, Տիար Հիլալ Ալ-Հիլալ փոխանցեց իր սրտին խօսքը: Ան դառնապէս դատապարտեց Քեսապի պատճառուած տեղահանութեան արարքը եւ ըսաւ. «Այսօր մենք Համաշխարհային պատերազմի մէջ կը գտնուինք եւ ամբողջ աշխարհ կը պատերազմի Սուրիոյ դէմ, սակայն ես կը հաստատեմ, թե՛ Սուրիոյ ճգնաժամը իր վերջին հանգրուաններուն մէջ

է եւ յոյսով ենք, որ պիտի յաղթահարենք այս դժուարին պայմանները մօտիկ ապագային, Սուրիական բանակին եւ Պետական իմաստուն ղեկավարութեան միջոցաւ»:

Պաշտամունքը վերջ գտաւ Տէրունական աղօթք «Հայր Մեր»-ի երգեցողութեամբ եւ Վեր. Համայնքապետ Յարութին Սելիմեանի առաքելական օրհնութեան աղօթքով:

Սեւան Չիրիշեան